



PAGHALAD

HA PUTLI NGA KASINGKASING NI MARIA

Basilica ni San Pedro

25 Marso 2022

O Maria, Iroy han Dyos ug Iroy namon, dida hini nga panahon hin pagsari, nadaraon kami ha imo. Kay ikaw man an amon Iroy, nahigugma ka ngan nakilala ka ha amon; waray kasurok'an han amon kasingkasing in diri mo nahibabaroan. Iroy han kalooy, nakadamo na kami hin pakatagamtam han imo panimangno ngan han imo murayaw nga pagpabilin dinhi ha amon. Diri ka nahunong hin pagtugway ha amon ngadto kan Jesucristo, Prinsipe han kalinaw.

Kundi nahisalaag kami ha dalan han kalinaw. Nahingalimot kami han pagturon-an han mga trahedya han naglabay nga siglo, an mga pagsakripisyo han mga yukot yukot nga mga tawo nga nagkamatay dida han duha nga Guerra mondial. Ginsalikway namon an mga ginsumpaan han katilingban han kanasuran. Ginlingo namon an kanan tawo inop hin kamurayaw ngan an mga paglaum han mga batan-on. Nagin hakog kami; naghunahuna la kami han amon kalugaringon nga mga nasud lakip na an mga karuyagon han kada tagsa. Waray kami paalantad han mga panginahanglan han iba lugod gintutukan la namon an amon kalugaringon. Asay ginpili namon an diri pakigbali ha Ginoo, an pagsunod la han amon mga ilusyon, an paghinambog ug panlupig, an pagpasipara han kinabuhi han mga inosente ngan an pagtirok hin mga hinganiban. Waray na kami panginlabot han amon mga amyaw ngan waray na pagmangno han kalibutan nga igintapod ha amon. Gin-guba namon an hardin han kalibutan tungod han mga kasamok ngan tungod han amon mga sala nakabido kami han amon langitnon nga Amay, nga karuyag nga kilal-on namon an amon mga igkasi nga amon ngahaw kabugtoan. Waray kami manginlabot han iba ug han ngatanan labot la han amon kalugaringon. Puno hin kaawod, nasing kami: Pasayloa kami, Ginoo.

Baraan nga Iroy, ha butnga han kamakalooloy han amon pagkamakasasala, ha butnga han amon mga paniguro ug kaluya, ha butnga han misteryo han karat-an ug kasamokan, nagpapahinumdom ka nga an Dyos diri nabaya ha amon, lugod puno hin paghigugma, nagpapadayon hin panimangno ha amon, andam pagpasaylo ha amon ngan pagbayaw ha amon ngada hin bag-o nga kinabuhi. Ginhatag ka niya ngadi ha amon ngan an imo Putli nga Kasingkasing nahimo nga darangpan han Singbahan ug han bug-os nga katawhan. Tungod han mapuanguron nga kaburot'on han Dyos, nagpapabilin ka ha amon; bisan ha pinakamakuri nga takna han amon kasaysayan, aada ka puno hin iroynon nga paghigugma basi matugwagyan kami.

Nadaraon ngan nagsapit kami ha imo kasingkasing. Imo kami mga hinigugma nga mga anak. Ha kada panahon, nagpapakilala ka ha amon, nagtatawag ha amon hin pagbag-o. Dida hini nga mapait nga takna, buligi kami ngan hatagi kami han imo pahalibway. Sumati na liwat kami: “Waray ba ako dinhi, ako nga imo Nanay?” Nakakahimo ka hin paghubad han mga nakakabutok han amon mga kasingkasing ug amon mga panahon. Ha imo nasarig kami. Natapod kami nga, ha mga takna hin pagsari, diri mo ginpapakabung’lan an amon mga pangaraba, lugod namamati ka ug nabulig ha amon.

Sugad hini an imo ginbuhat ha Cana ha Galilea, diin naginyupo ka kan Jesus ngan ginbuhat niya an syahan nga milagro. Basi magpadayon an kalipay dida han kombite han kasal, nagsering ka ha iya: “Waray na hira bino” (Jn 2:3). Yana, O Maria, iyakan na liwat ito nga mga pulong ngan ito nga pagampo kay yana nga panahon nauubusan na kami han bino han paglaum, nawarayan na kami hin kalipay, ngan nawara na an kamagburogto. Nahingalimot na kami nga mga tawo kami; ginkaragan namon an upa han kalinaw; ngan nahimo kami nga mga kasangkap-an hin pandaut ug panhibang. Hin pagkadako han amon panginahanglan han imo iroynon nga panabang!

Sanglit, O Iroy namon, pamatii an amon pagampo.

Bitoon han Dagat, ayaw itugot nga malunod an amon sakayan dida han bagyo han kasamok,

Hinipusan han Bag-o nga Ginsaaran, pag-aghat hin mga buhat ug mga dalan hin pagkasarangkay

Rayna han Langit, ibalik an kalinaw han Dyos dinhi ha kalibutan.

Wad-a an kasina ug pag-ibinubulusan, ngan tutdoi kami hin pagpasaylo

Gaw’sa kami ha mga kasamok, panalipdi an kalibutan han pantarhug han mga hinganiban nga nuklear.

Rayna han Santos nga Rosaryo, pahinumdumi kami han amon panginahanglan hin pag-ampo ug paghigugma.

Rayna han tawhanon nga panimalay, ipakita ha tawo an dalan han pakamagburogto.

Rayna han kalinaw, hatagi hin kalinaw an amon kalibutan.

O Iroy namon, an imo masulob-on nga panginyupo makalukmay unta han amon mga magtig-a nga kasingkasing. An imo mga luha para ha amon magdilig unta han amon tuna nga mamara tungod han amon mga pagdumot agud ini mabuhi ug lumangbo. Ha butnga han mga huni han mga hinganiban han guerra, an imo pagampo magpahinumdum unta ha amon han kalinaw. An imo iroynon nga paghapuhap magtambal unta han mga nagsasakit ug nanngalagiw tungod han pagpauran hin mga bomba. An imo iroynon nga pag gakos maglipay unta hadton napiritan hin pagbaya han ira mga panimalay ug han ira tuna nga nataw’han. An imo Masulob-on nga Kasingkasing magdasig unta ha amon hin pagpaid ngan mag-aghat ha amon hin pagbukas han amon mga porta basi manimangno han amon kabugtoan nga nagkahihibang ug pinanmayaan.

Baraan nga Iroy han Dyos, samtang natukdaw ka ha tiilan han kros, hi Jesus, ha pagkita han tinun-an dida ha imo sapit, nagsering” “Ini an imo anak” (Jn 19:26). Ha sugad nga paagi, igintubyan an kada usa ha amon ngada ha imo. Ngada han tinun-an ug ngadi ha tagsa-tagsa ha amon, nagsering hiya: “Ini an imo Nanay” (v. 27). O Maria, Iroy namon, nagtutuyo kami hin pagdapit ha imo ha amon mga kinabuhi ug ha amon kasaysayan. Dida hini nga takna, an klnakapoy ug nawuwurok nga katawhan natukdaw kaupod nimo ha tiilan han kros, nagkikinahanglan hin pagtubyan ha iya ngahaw ngada ha imo, ngan pinaagi ha imo, hin paghalad ha iya ngahaw ngada kan Cristo. An katawhan ha Ukraina ug Rusia, nga dako nga paghigugma nagpapasidungog ha imo, yana nadaraon ha imo, kay an imo kasingkasing napaid ha ira ug han ngatanan nga katawhan nga naibanan tungod hin mga kasamok, gutom, panraugdaog ug kakablasan.

Sanglit, O Iroy han Dyos ug Iroy namon, ha imo Putli nga Kasingkasing, igintutubyan ug iginhahalad namon an amon kalugaringon, an Singbahan ug an bug-os nga katawhan, labi na gud an Rusia ug Ukraina. Karawata ini nga amon buhat ha pagsarig ug paghigugma. Itugot nga mapuypoy na an kasamok ngan an kalinaw maghadi ha bug-os nga kalibutan. An “Fiat” nga tikang han imo kasingkasing nagbukas han ganghaan han kasaysayan ngada han Prinsipe han kalinaw. Natapod kami, nga pinaagi han imo kasingkasing, magpupunias an kalinaw. Ha imo naghahalad kami han kabubuwason han bug-os nga tawhanon nga panimalay, an mga kasurok-an ug pamumulaton han tagsatagsa, an kabarak’an ug mga paglaum han kalibutan.

Pinaagi han imo pagampo, igbubo unta an kalooy han Dyos nganhi ha kalibutan ngan mahibalik na an kalinaw ha amon mga adlaw. O Iroy namon han “Fiat”, ha kanay kinmunsad an Espiritu Santo, ibalik ha amon an pagkaarangay nga natikang han Dyos. Ikaw, an amon “buhi nga burabod han paglaum,” magdilig unta han mamara namon nga mga kasingkasing. Ha imo tiyan, nahimo nga tawo hi Jesus; buligi kami basi magin kasangkapan han pagkaurosa. Ikaw nga anay naglalakaton ha kadalanan han kalibutan, tugwagyi kami yana ha kadalanan han kalinaw. Amen.